

Лъыган Нувуқақ углапихсахтуқ. Лъыган аньяхтуғақылгит. Упынгақңаку қамиғақылгит. Акмайъоғыт тамакут имиглуки агвыңақңата ңан, пугнылиглуки агукугакет. Лъика тана аньяқ-ам. укумтуңыңани тункугекут. Сивукуль ныгыфкагекут. Таўхкын агукугакут. Тункугекут малигулъыгенун агнагалъта, нукальпегат акуна. Нами унитакет. Имақ тана пируғақңан-ам аньякут. Пинитун қавақьяната айвыағнаҳқақңаку. Туклъугақетыкут амагьяхтуйқылъта. Аҳпалгигакут қимухсимың. Тагутакут, лъыган уқиҳсеқапут. Аҳпалгинығмың тақақңата, тана апы ылақат.

Тамана амингақ таўавык ыкугақат. Таўхкын-ам санегутақңан аньягнегутақңан амингақ тамана амулапихтақат. Уқиҳсипихтакукут. Тамакут мантыгат тапҳиглуки ңан имыгакет-ам, тапҳиглуки эномакет. Ыкеҳсаҳқат. Укйўукатақңаку амавык аньякут. Илисимақыпихтанка полъақңата саякут.

Илини тамана тафсиўқахқақ тапхақ капихтақыкит. Нами кыливугат. Акуна агўатңанлъыгит тафсиўқахқаның пекет. Хўаңкута ситкунагмит такут тыңаюлитут. Тыңают таўавык асилъуки саякукут.

Қулңалигақыкет ыныт тамакут. Альпагатыпихтақылге тамана. Суңалихтулъта, талъигалихтулъта. Қахапихтақылгит. Атыкльуната матамта. Умакут, умагнекет. Салыгнун лъыган умакут. Альикигекут лъыган саның. Лъика каякут таўатылңулыгнун. Паюхтат альикигакет. Илисатыкылътың агйўакут.

– Натын?

– У-у, қамай, саеҳси!

Нувуқахмит анланиягатыпихтакут. Итыгатыпихтакут саяхқанун. Ыныт тамакут имипихтакет. Такут қафсит саялгыт атугакут. Гинакухтагакут илет.